

廣陵覽古卷二

江都顧鑾謝唵氏述

甘泉山

在城西三十五里

鑾

按山有七峰聯絡如斗平地錯落諸圓岡凡二十八若星拱然第一峰環視諸山在江南者臚臚如列坐山高二十五丈周二里上有并甚甘故名

盤古山

在城西三十里上有廟其神披髮席地而坐蓋本漢興平

廣陵覽古卷二

一

初成都太守高朕所繪禮殿聖賢圖

鑾

按志載城西盤古冢冢上有廟豈此山卽其冢耶

小金山

在北門外

鑾

按宋賈似道重建雲山閣於此卽環碧亭址治亭臺精舍俱備掘其下爲深沼又爲平野堂卽觀稼堂舊址春日卉木競發揚人遊觀不絕

蜀岡

在城西四里一名崑岡鮑昭蕪城賦軸以崑岡是也相傳

地脉通蜀故名寰宇記云蜀岡有茶園其茶甘香如蒙頂  
蒙頂在蜀故名岡焉

宋蘇軾次韻伯固遊蜀岡送叔師奉使嶺表詩新苗未沒  
鶴老葉初翳蟬綠渠浸麻麥白板燒松煙笑窺有紅頰醉  
卧皆華顛家家機杼鳴樹樹梨棗懸野無佩犢子府有騎  
鶴仙觀風嶠南使出相山東賢渡江弔狼石過嶺酌貪泉  
與君步徙倚望彼修連娟願及南枝謝早隨北雁翩歸來  
春酒凍共看山櫻然

蒙谷

廣陵覽古卷二

二

在城東北五里竹西亭之北

宋歐陽修詩一徑崎嶇入谷中麥條紅刺胃春叢花深時  
有人相應竹密初疑路不通 梅堯臣詩茗園葱蒨與山  
籠一夜驚雷發舊叢五馬留連未能去土囊深處路微通

召伯湖

在縣治北四十五里東接艾陵湖西接白茆湖南通新城  
湖北接甓社湖春夏湖水漲漫民田滄沒晉謝太傅安鎮  
廣陵時修築湖埭田始獲歲民被其澤比之召伯甘棠因  
名湖與埭焉

宋陳造召伯停舟避雨詩窗度荷芰風舟艤鴛鴦浦落帆  
憩篙師辟此白淙雨長征取愜快留滯不云苦適喜懸麻  
勢爲盪爍石暑去年舟繫柳卧看虹飲渚龍公會事發尙  
記跳珠語崎嶇不諧俗似爲龍所予一杯酬新涼開餅先  
酌汝

### 小新塘

在上雷塘東北由淮子河東入漕河長廣共二里

鑾按祝穆方輿勝覽云宋紹定間以張燈之夕敗逆賊李  
全於此

## 廣陵覽古卷二

### 三

### 雷塘

在城北十五里煬帝每攜宮人來遊唐書貞觀十八年長  
史李襲譽引渠又築勾城塘以溉田八百頃

鑾按羅江東詩君王忍把平陳業祇換雷塘數畝田今坵  
墓已平莫攷所在

### 薔薇溝

在城東六十里今名薔薇港方輿勝覽云薔薇溝接高郵

### 永正港

### 公路浦

在城西嚴觀元和郡縣補志引初學記云袁術自九江東  
奔袁譚於下邳由此浦渡因名

### 九曲池

在城北七里蜀岡麓煬帝嘗建木蘭亭於池上作水調九  
曲每遊幸時按之故名

宋王琪詩越調誰家曲當年亦九成哀音已亡國廢沼尙  
留名儀鳳終沈影鳴蛙祇沸聲淒涼不可問落月背蕪城  
鑾按鮮于侁詩序云煬帝嘗奏樂於此池初帝欲幸江都  
命樂府撰水調九曲工人王令言謂其子曰此曲無回聲

### 廣陵覽古卷二

### 四

汝行必不返矣故唐白居易詩云五言一遍最辛勤調少  
情多似有因不會當時翻曲意此時腸斷爲何人蓋指此  
也

### 召伯埭

卽今召伯鎮謝太傅事解見前召伯湖

宋徐鉉召伯埭寄高郵陳郎中詩故人相別動經年候館  
相逢倍慘然顧我飲冰難輟棹感君扶病爲開筵河灣水  
淺翹秋鷺柳岸風微噪暮蟬欲識酒醒魂斷處謝公祠畔  
客庭前 蘇轍召伯埭別少遊詩濛濛春雨濕邗溝篷底

安眠晝擁裘知有故人家在此速將詩卷洗閒愁 秦觀  
次子由韻召伯埭見別詩孤篷短榜沂河流無賴寒侵紫  
綺裘召伯埭南春欲盡爲公重賦伴牢愁

### 月明橋

在禪智寺前今廢

唐張祜詩十里長街市井連月明橋上看神仙人生只合  
揚州死禪智山光好墓田

### 小市橋

在北水關外一名宵市橋相傳煬帝於此開夜市

## 廣陵覽古卷二

### 五

### 董井

董仲舒宅古江都縣基也仲舒爲江都王相宅內有井今  
爲兩淮鹽運使署故井在廳後

鑾

按大東門外北柳巷董子祠旁有董子義井明董其昌  
題二井以在運司署者爲的北柳巷董子祠乃前明正德  
間建也

### 蜀井

在蜀岡上禪智寺側其泉脈通蜀故名

宋蘇轍詩信脚東遊十一年甘泉香稻憶歸田行逢蜀井

恍如夢試煮山茶意自便短綆不收容盥濯紅泥仍許置  
清鮮早知鄉國勝爲客遊宦何須更著鞭

鑾

按元和郡縣補志引藝文類聚云蜀岡上有井曰蜀井  
茶品天下有二十種此水第七又按李日華紫桃軒又綴  
云楊州蜀岡上井與蜀江通有老僧洗鉢江中失之從井  
浮出爲禪智僧所得置佛前後數年老僧過而見之驚曰  
何緣到此脫衲衣贖去

玉勾洞天井

在蕃釐觀

廣陵覽古卷二

六

鑾

按名勝志及汪懋麟玉勾洞天記唐時有黃冠持畫軸  
謁守帥畫中字皆雲章鳥篆不可識旣去使人尾其後至  
后土井而沒乃使獄囚縋下視之見一洞署曰玉勾洞天  
復使入則水漫不可尋矣

青龍泉

舊屬天寧寺自築新城後泉界在天寧門內相傳泉有青  
龍能興雲雨凡郡守禱雨濟民屢著靈驗

第五泉

在城西北大明寺側唐張又新煎茶水記品大明寺井爲

第五泉宋歐陽修有大明寺水記明御史徐九皋立石書  
第五泉

鑾按郡人汪應庚於乾隆二年平山堂右鑿池得古井井  
大於常甃甃堅瑩鑄殿司監造字井纍景福錢盈貫水清  
冽而甘聞者爭攜鎚瀹茗謂此乃古第五泉云

### 隋江都宮

在城西七里大儀鄉隋書大業元年敕長史王宏大修江  
都宮卽此

煬帝江都宮行樂歌云揚州舊處可淹留臺榭高明復好

### 廣陵覽古卷二

### 七

遊風亭芳樹迴蚤夏長皋麥隴送餘秋淥潭桂檝浮青雀  
果下金鞍躍紫騮碧觴素蟻流霞飲長袖清歌樂戲舟  
杜牧詩龍舟東下事成空蔓草萋萋滿故宮亡國亡家爲  
顏色路桃猶自恨春風 李商隱詩紫泉宮殿鎖煙霞欲  
取蕪城作帝家玉璽不緣歸日角錦帆應自到天涯於今  
腐草無螢火終古垂揚有暮鴉地下若逢陳後主豈宜重  
問後庭花 金元好問隋故宮行渭川楊柳先得春二月  
鶯啼百轉新長春宮中千樹錦暖日晴雲思煞人君王半  
醉唱吳歌絳仙起舞顰翠蛾吳兒漫說曾尋樂三十六宮

能幾多千秋萬古金銀闕海沒三山一毫髮繁華夢覺人  
不知留得寒螿泣秋月

### 十宮

寰宇記云在城北五里長阜苑內並煬帝建也

變

按十宮舊志謂歸雁迴流松林楓林大雷小雷春草九  
華光汾九里凡十名

### 水精殿

在江都宮內

變

按馬縞中華古今注云煬帝於江都宮置水精殿令宮

## 廣陵覽古卷二

## 八

人戴通天百葉冠子插瑟瑟鈿朶皆垂珠翠披紫羅帔把  
半月雉尾扇鞞瑞鳩頭履謂之飛仙

### 章武殿

在城北建隆寺內

變

按舊志謂宋太祖征李重進後以御營建寺所御之榻  
留焉僧徒建殿崇奉名曰章武且請降御容景德二年遣  
中使奉御容於寺靖康閒徽宗至揚州詣殿謁拜建炎初  
殿圯寶祐中賈似道鎮揚州復修

### 隋苑

在城西北九里大儀鄉亦名西苑

鑾按通鑑大業元年於長安築西苑周二百里則江都止  
隋苑耳而名勝志謂亦名西苑並引杜司勳紅霞一抹廣  
陵春句謂卽指此想沿長安西苑之名以稱隋苑事或有  
之相傳苑址僅三里

### 螢院

在大儀鄉隋苑南三里唐杜牧有秋風放螢苑句卽指此  
鑾按隋書大業十一年煬帝至東都十二年五月於景華  
宮徵螢火得數斛夜出遊山放之至七月甲子幸江都宮

### 廣陵覽古卷二

### 九

則螢苑固不在揚州也然義山詩欲取蕪城作帝家下云  
於今腐草無螢火唐去隋甚近而樊川義山所詠皆然必  
有據也

### 甲仗樓

晉謝安建在步邱之新城

唐張籍新城甲仗樓詩云謝氏起新樓西臨城角頭圖功  
百仗利藏器五兵修締構棖蕘固虛名戶檻幽魚龍卷旗  
幟霜氣積戈矛暑雨歛蒸隔涼風宴笑留城高形出沒山  
靜氣清悠睥睨斜光徹欄干宿靄浮芊芊秔稻色脈脈苑

溪流郡化王丞相詩成沈隱侯居茲良景得殊勝峴山遊  
文選樓

相傳在太平橋北旌忠寺乃其故址祀梁昭明太子像於  
寺

鑾按大業拾遺記云帝幸昭明文選樓先命宮娥數十人  
昇樓迎侍宋王觀揚州賦云帝子去兮空文選之樓此外  
無指昭明文選樓在揚州者惟明一統志辨之最悉謂隋  
祕書監曹憲江都人以文選教授生徒李善魏模皆出其  
門所居號文選巷樓蓋以憲得名今阮中丞元宅卽憲故  
址於家廟後建樓兩江鐵制軍保書額曰隋文選樓

廣陵覽古卷二

十

迷樓

在城西北七里

唐杜牧詩煬帝雷塘上迷藏有舊樓誰家唱水調明月滿  
揚州

鑾按古今詩話浙人項昇進新宮圖於煬帝令揚州依圖  
營建既成帝幸之曰使真仙遊此亦自當迷乃名

摘星樓

名勝志云寶祐城樓故摘星樓也江淮南北一覽可盡賈

似道置額曰三城勝處紹聖間晁補之坐修摘星樓不覈  
實支省錢左遷

### 騎鶴樓

在府東北大街大平廣記云昔有四人各言所願甲願多  
財乙願爲揚州守丙願爲仙丁曰腰纏十萬貫騎鶴上揚  
州蓋兼三人之願也後人因以名樓

### 明月樓

在府東北大街

鑾按語林云揚州趙氏好客有明月樓一時題咏甚多咸

未當意趙子昂過揚州主人乞作楣帖索筆題云春風閨  
苑三千客明月揚州第一樓主人喜甚撤酒器爲贈蓋唐  
徐凝之有句云天下三分明月夜二分無賴是揚州子昂  
意實本此

### 彭城閣

舊爲彭城村煬帝因以名閣先是開皇末有泥彭城口之  
謠迨後果驗

唐李益詩故國歌鐘地長橋車馬塵彭城閣邊柳偏似不  
勝春

雲山閣

在城西北宋陳升之建

宋秦觀詩雲山簷楯接低空公宴初開氣鬱葱照海旌旗  
秋色裏徹天簫鼓月明中香槽旋滴珠千顆歌扇驚圍玉  
一叢二十四橋人望處台星正在廣寒宮

鑾

按寶祐志閣建於陳升之後呂公著嘗遊其上值中秋  
燕客時秦觀以舉子入謁呂素聞其才命卽席爲樂語觀  
作此詩一坐歎服淳熙閒郡守鄭興裔增大之名雲山觀  
後圯賈似道鎮淮之五年復雲山觀於小金山

廣陵覽古卷二

十二

吳公臺

在城西北四里通鑑武德元年八月隋江都太守陳稜求  
得煬帝之柩改葬於江都宮西吳公臺下卽此

唐劉長卿登吳公臺詩古臺搖落後秋入望鄉心野寺人  
來少寒峰水隔深夕陽依舊壘寒磬滿空林惆悵南朝事  
長江獨至今

鑾

按方輿紀要宋沈慶之攻竟陵王誕築臺以弩射城中  
故名弩臺陳大建中吳明徹圍北齊東廣州刺史敬子猷  
增築之亦以射乘堞之士故號吳公臺又名雞臺昔隋煬

帝常於此遊恍惚遇陳後主後主指其女侍曰此張麗華也每憶桃葉山前乘戰艦與此子北渡時麗華方倚臨春閣試紫毫筆書小砑紅綃作璧月詞未終見韓擒虎躍青驄擁萬甲直來衝入人都不存就至今日大抵人生各圖快樂曩時何見罪之深耶帝悟叱之恍然不見

### 崑邱臺

在禪智寺側取蕪城賦軸以崑岡故名舊有此臺非歐公築也

宋歐陽修詩訪古高臺半已傾春郊誰從綵旗行喜聞車

### 廣陵覽古卷二

### 十三

馬人同樂慣聽笙歌鳥不驚

### 鬪雞臺

唐杜牧揚州詩春日鬪雞臺又趙嘏廣陵道中詩鬪雞臺邊花照塵或云卽吳公臺

### 風亭 月觀 吹臺 琴室

宋書廣陵城北有陂澤水物豐盛徐湛之更起風亭月觀吹臺琴室招集文士極遊觀之盛

鑾

按大業招遺記煬帝至江都選殿脚女吳絳仙等給事月觀卽徐之舊址一夕烟景清明帝乘月來幸左右皆寢

帝凭蕭后肩話東宮時事

### 新亭

在蜀岡上南史宋竟陵王誕舉兵廣陵沈慶之進軍新亭  
逼之卽此

### 木蘭亭

隋煬帝建在九曲池上

宋徐鉉重遊木蘭亭詩繚繞長隄帶碧潯昔年遊此尙青  
衿蘭橈破浪城陰直玉勒穿花苑樹深宦路塵埃成久別  
仙家風景有誰尋那知年長多情後重凭欄千一獨吟

## 廣陵覽卷二

## 十四

### 摘星亭

卽迷樓故址

宋蘇轍詩闕角孤高特地迷迷藏渾忘日東西江流入海  
情無限暮雨連山醉似泥夢裏興亡應未覺後來愁思獨  
難齊只堪留作遊觀地看遍峰巒處處低

### 賞心亭

唐咸通中丞相李蔚移鎮淮南於戲馬臺西連玉鈞斜路  
開闢池沼構亭臺以爲遊觀之地時浙右小校薛陽陶監  
運度支米八城召與同遊問及蘆管之事陶因獻奏一曲

其管絕微聲如天際自然而來公大佳賞贈詩有云虛心  
織質雁銜餘鳳吹龍吟定不如亭因以賞心名之東坡云  
路失玉鈞芳草合卽其地也

鑾按白孔六帖作賞心樓

水亭

在城北隅

鑾按名勝志云唐獨孤及建以汎舟望月宴集賦詩後徐  
知誥夜引宋齊邱於水亭置火爐相向不言畫灰爲字隨  
卽滅去所謀甚秘人莫得知

廣陵覽古卷二

十五

九曲亭 波光亭

宋藝祖破李重進駐蹕蜀岡寺有龍鬪於九曲池命立九  
曲亭以紀其事後圯乾道二年郡守周淙重建易以波光  
亭額已而亭廢池塞慶元五年郭杲命工濬池引注諸塘  
之水建亭於上遂復舊觀又築風臺月榭東西對峙繚以  
柳陰亦一時勝境也宋陳造有波光亭賦

竹西亭

舊址在禪智寺側取杜牧誰知竹西寺歌吹是揚州句命  
名宋郡守向子固易爲歌吹亭紹興中燬郡守周淙重建

復舊名歲久圯廢復建於北岬皂角樹側

宋歐陽修詩十里樓臺歌吹繁揚州無復似當年古來興廢皆如此徒使登臨一慨然 梅堯臣詩結雨竹西若若川揚州歌吹似當年劉郎若向風前唱夢入青樓事惘然 蘇軾詩竹西失却上方老石塔還逢惠照師我亦化身東海去姓名莫遣世人知 呂本中詩十年走塵土重上竹西亭草木新榮態江山舊典型狂風掃毒暑落月伴疏星認取揚州路荒城一抹青

### 春貢亭

#### 廣陵覽古卷二

#### 十六

在蜀岡上蜀岡產茶甘香如蒙頂宋時入貢有春貢亭

宋歐陽修和劉原父春貢亭詩崑邱蒙谷接新亭畫舸悠悠春水生欲覓揚州使君處但隨風際管弦聲 梅堯臣詩蒙谷浮船穩且平泊登岡頂看茶生始從官屬二三輩時聽春禽一兩聲

### 無雙亭

一統志謂蕃釐觀內瓊花天下無雙宋歐陽修守揚州作無雙亭聞見雜錄謂宋郊構亭花側榜曰無雙未知孰是宋歐陽修無雙亭荅劉發運詩瓊花芍藥世無倫偶不

題詩便怨人曾向無雙亭上醉自知不負廣陵春 劉敞  
無雙亭觀瓊花贈聖民詩東風萬木競紛華天下無雙獨  
此花那有靈英凌暖日不爲琪樹隔流沙祠城寂寂春空  
老江雨冥冥日易斜仙品國香俱妙絕少傾高興盡流霞  
變按齊東野語云揚州后土祠瓊花無二本仁宗朝嘗分  
植禁苑輒枯復載還敷榮如故淳熙中壽皇亦嘗移植南  
內逾年憔悴仍送還之杜遊瓊花記謂紹興辛丑金人揭  
本而去其小者剪而誅之明年根旁復生三蘖道士金大  
寧培護久之暢茂如故元至元十三年忽枯道士金丙以  
種絕矣

### 斗野亭

在召伯鎮梵行院之側宋熙寧二年建揚州於天文屬斗  
分野故名紹興元年郡守鄭裔更造於迎恩橋南嘉定間  
崔與之改題曰江淮要津而移斗野扁揭於北門外  
宋蘇軾次孫覺韻斗野亭詩落帆謝公渚日脚東西平孤  
亭得心憩暮春含餘清坐待斗與牛錯落掛南甍老僧如  
夙昔一笑意已傾新詩出故人舊事疑前生吾生七往來

迸老海上城逢人輒自哂得魚不忍烹似聞續溪老復作  
東都行小詩如秋菊艷艷霜中明過此感我言長篇發春  
榮

玉立亭

在蕃釐觀內觀本古后土祠

宋嘉定中郡守崔與之任滿有辭后土祠題玉立亭詩天  
上人間一樹花五年於此駐高牙不隨紅藥矜春色爲愛  
霜筠耐歲華四塞風清天籟寂半庭月冷市塵賒臨行更  
致平安福一炷清香十萬家

廣陵覽古卷二

十八

時會堂

在蜀岡上乃宋時造貢茶之所

宋歐陽修和劉原父詩積雪猶封蒙頂樹驚雷未發建溪  
春中州地暖萌芽蚤入貢宜先百物新 憶昔嘗修守臣  
職先春自探兩旗開誰知白首來辭禁得與金鑾賜一杯

平山堂

在蜀岡法淨寺側宋歐陽修建

宋劉敞登平山堂寄歐陽內翰詩蕪城此地遠人寰盡借  
江南萬疊山水氣橫浮飛鳥外嵐光平墮酒杯間主人留

賞來何暮遊子消愁醉不還無限秋風桂枝老淮王仙去  
可誰攀 歐陽修和詩督府繁華久已闌至今形勝可躋  
攀山橫天地蒼茫外花發池臺草莽間萬井笙歌遺俗在  
一樽風月屬吾閒遙知爲我留眞賞恨不相隨暫解顏  
王安石詩城北橫岡走翠虬一堂高視兩三州淮岑日對  
朱薨曲江岫雲齊碧瓦浮墟落耕桑公愷悌杯觴談笑客  
風流不知峴首登臨處壯觀當時有此不 蘇軾平山堂  
次王居卿祠部韻詩高會日陪山簡醉狂言屢發次公醒  
酒如人面天然白山向吾曹分外青江上飛雲來北固檻

廣陵覽古卷二

十九

前修竹憶南屏六朝興廢餘邱隴空使姦雄笑寧馨

鑾

按宋慶歷八年廬陵歐陽修守揚州時建以南徐諸山  
環拱望與堂平故名夏月修每宴客堂中走人召伯湖折  
荷插壁命妓以花行酒載月而歸後糜師旦刁約周淙鄭  
興裔趙師古史巖之先後修葺之張懷古沈括洪邁樓鑰  
各有記

國朝

列聖臨幸欽頒

宸翰名山賢守遭遇殊榮矣

谷林堂

在蜀岡上法淨寺側宋元祐中建

宋蘇軾谷林堂詩深谷下窈窕高林合扶疎美哉新堂成  
及此秋風初我來適遇雨物至如娛予稚竹正可人霜節  
已專車老槐苦無賴風花欲填渠山雅爭呼號谿蟬獨清  
虛寄懷勞生外得句幽夢餘古今正自同歲月何必書

董仲舒宅

明洪武間改爲今兩淮鹽運司公署見前董井

太傅謝安宅

廣陵覽古卷二

二十

在府城運司治之南今謝太傅祠是也晉寧康間安鎮廣  
陵居此手植雙檜至宋猶存

唐劉禹錫詩雙檜蒼然古貌奇含煙吐霧鬱參差晚依禪  
客當金殿初對將軍映畫旗龍象界中成寶蓋鴛鴦瓦上  
出高枝長明燈是前朝焰曾照青青年少時 張祜詩謝  
家雙植本圖榮樹老人亡地變更朱頂鶴知雙蓋偃白眉  
僧見小枝生高臨月殿秋雲影靜入風簷夜雨聲縱使百  
年爲上壽綠陰終借暫時行 溫庭筠詩晉朝名輩此離  
羣相對濃陰去住分題處尙尋王內史畫時應是顧將軍

長廊夜靜聲疑雨古殿秋深影似雲  
一下南臺別人世晚  
泉清籟更誰聞

### 東嶽廟

今在新城洗馬橋舊在拱辰門外有  
高阜名太山者其故址也

元成廷珪廣陵嶽宮黃籙壇詩濛濛  
雲氣濕霓旌小隊紅  
綃鳳蠟明鸞鶴舞隨行道影魚龍  
出聽步虛聲淮南高士  
青毛節句曲仙人碧玉笙一路天  
風吹不斷此身今夕在蓬瀛

### 關帝廟

在府城三元巷後武廟元馮子振作  
廟記蘇昌齡爲之製起語趙孟頫書  
丹稱爲三絕碑

鑾

按鹽法志云元馮子振在揚州作廟  
碑文起欲壯語而構思未就蘇昌齡  
時甫弱冠代起云大丈夫忠憤不酬  
於尺寸而廟食磅礴於九州功名不  
留於須臾而義烈感慨於千古馮大  
喜足成之趙孟頫爲之書碑今在三  
元巷廟壁間

### 司徒廟

在平山堂右搜神記云神五人異姓茅許祝蔣吳也又南史載揚州茅智勝等五人竊忠臣王琳之喪於陳送之建鄴後人謂卽五人事又傳五人約爲兄弟好畋獵地舊多虎五人捕除其害人思其德歿爲立廟隋追封司徒加侯爵宋紹定間李全寇揚州禱於廟不吉怒剖神像全尋敗走新塘衆磔殺之人以爲神之報也守帥趙范奏新其廟賜額曰英顯賈似道鎮揚州請加王號歷世靈爽頗著

露筋祠

在召伯鎮北三十里地與高郵分界祠祀高郵貞女宋紹聖元年十月米芾書碑立於祠歐陽修層蚊詩有傷哉露筋女萬劫讐不復句舊志姓氏時代皆莫考

國朝乾隆丁丑壬午恭逢

高宗純皇帝南巡兩邀

宸翰

欽定露筋爲唐時烈女冰霜之操萬古增輝矣

鑿按隨園詩話云高郵露筋祠說部有四解或云鹿筋梁

地名也有鹿爲蚊所嚙露筋而死故名或云路金者人名也五代時將軍戰死於此故名或云有遠商二人分金于

此一人忿爭不已一人悉以贈之其人大慚置金路上而去後人義之以其金爲之立祠故名路金訛爲露涇所云姑嫂避蚊者乃俗傳一說耳云云然歐陽文忠公爲大宋名儒亦主避蚊之說必有所據隨園之論借資博辨可也  
梵行院

在召伯鎮河西今梵行教寺相傳晉康寧間僧行密建寶祐志作楊行密建或以僧名同楊誤傳宋時院有山茶東坡詩以紀之

宋蘇軾詩山茶相對阿誰栽細雨無人我獨來說似與渠

廣陵覽古卷二

二十三

渠不會爛紅如火雪中開

棲靈寺

在平山堂左乾隆三十年

賜名法淨寺舊有塔九級今無

唐李白秋日登棲靈寺塔詩寶塔凌蒼蒼登攀覽四荒頂高元氣合標出海雲長萬象分空界三天接畫梁水搖金刹影日動火珠光鳥拂璫簾度霜連繡拱張日隨征路斷心逐去帆揚露洗梧楸白霜催橘柚黃玉毫如可見於此照迷方 白居易詩半月騰騰在廣陵何樓何塔不同登

共憐筋力猶堪任上到棲靈第九層

鑾

按隋仁壽元年詔海內清淨處立塔三十所棲靈其一也後塔燬相傳空中見祥雲擁一塔而去有使自高麗回見一僧手擎一塔問之曰揚州棲靈寺塔也至揚而塔已焚又傳唐武宗時劉隱之遊明州夢汎海見塔東渡僧懷信立塔第三層與語謂暫送塔過東海後隱之歸揚訪懷信信曰憶海上相見否隱之了然省記不數夕而塔焚俱盡宋景德中僧可政復募金建塔七級名曰多寶郡守王化基爲請賜名晉惠旣而塔寺俱圯明萬歷間郡守吳秀

廣陵覽古卷二

二十四

卽故址建寺崇禎中齟使楊仁願修之

國朝卽塔故址增建僧察殿閣恭迓

列聖臨幸寺本名刹得此益壯煙雨樓臺之景色矣

法華寺

在召伯鎮東隋大業間建一名來鶴寺寶祐志作法華禪院周世宗征淮南駐蹕於此宋開寶中賜寺額內有銅鐘重千斤僧子惠募鑄

宋蘇軾銘其鐘曰無量智慧火燒此無名銅戒定以爲模鑄成無漏鐘以汝平等手執彼慈悲撞聲從無所出遍漏

無邊空

上方寺

卽禪智寺一名竹西寺在城北五里蜀岡上每天氣清朗  
南徐諸山蒼然襟帶間隋煬帝幸江都令合東西南北四  
寺爲一更名上方禪智寺寺內有石刻吳道子畫寶誌公  
像李白作讚顏真卿書謂之三絕碑又有蘇軾送李孝博  
詩石刻唐碑宋碣今並砌於寺東廊之壁

唐杜牧禪智寺詩雨過一蟬噪飄蕭松桂秋青苔滿階砌  
白鳥故遲留暮靄生深樹斜陽下小樓誰知竹西路歌吹

廣陵覽古卷二

二十五

是揚州 趙嘏和杜侍郎題禪智寺南樓詩樓畔花枝拂  
檻紅露天香動滿簾風誰知野寺遺鈿處盡在相如春思  
中 羅隱春日獨遊禪智寺詩遠樹連天水接空幾年行  
樂舊隋宮花開花謝還如此人去人來自不同鸞鳳調高  
何處酒吳牛蹄健滿車風思量只合騰騰醉付與平陳一  
夢中 宋韓琦荅袁陟節推遊禪智寺詩春去惜餘景偶  
來郊外觀蕪城千古恨一顧殊悲酸荒祠枕大道尙記吳  
城邗遠近綠陰合水襯紅莢殘隴麥齊若剪隨風轉波瀾  
罷農喜有望守臣心粗寬蕭疎禪智寺壞址不甚完叢花

亂芍藥籬竹摧琅玕空有亭亭柏成行如筆端供帳具朝  
饕餮菜成清歡小杜詩板暗樂石曾未刊乘興詣茶圃百  
步登平巒摘焙試烹啜甘挹零露溥午過倦微暑隄路騰  
歸鞍天子憂歲旱引咎古所難列郡承新詔朝夕弗敢安  
況此行春意固不在遊盤朝廷責吏治莫若久其官政和  
氣亦應灾沴無由干願循三載舊庶幾酬素餐 蘇軾歸  
宜興留題竹西寺詩三首十年歸夢寄西風此去眞爲田  
舍翁剩覓蜀岡新汲水要攜鄉味過江東 道人勸飲雞  
蘇水童子能煎鶯粟湯暫借籐牀與瓦枕莫教辜負竹風

廣陵覽古卷二

二十六

涼 此生已覺都無事今歲仍逢大有年山寺歸來聞好  
語野花啼鳥亦欣然 米芾竹西寺詩竹西桑柘暮雅盤  
特地霜風滿倦顏不用使君相料理都緣塵土蔽青山

白塔寺

在宜陵鎮東白塔河

唐顧况酬揚州白塔寺永上人詩塔上是何緣香燈續細  
煙松枝當麈尾柳絮替蠶絲浮草經行遍空花義趣圓我  
來雖爲法暫借一牀眠

華林寺

在城西北大儀鄉神僧傳云揚州華林寺內有張遼墓寺僧多爲鬼物惑亂元和中釋靈坦居之寂然無事

### 鐵佛寺

舊在縣西北堡城東本楊行密故宅光化間改爲光化寺宋建隆中於寺鑄鐵佛故名天聖間復爲光化寺寺有塔後塔與寺俱圯淳熙中重建於城北威烈王廟東今仍名鐵佛寺

宋韓琦鐵佛寺會僚友詩寺枕隋家廢苑邊登高還此會僚賢凭欄莫賦悲秋事剩撚黃花送酒船 誰言秋色不

### 廣陵覽古卷二

### 二十七

如春及到重陽景自新隨分笙歌行樂處菊花萸子更宜人 蘇轍題光化塔詩山頭孤塔闕真人云是僧伽第二身處處金錢追晚供家家蠶麥保新春欲求世外無心地一掃胸中累劫塵方丈近聞延老宿清朝留客語逡巡 秦觀次韻子由題光化塔詩古佛悲憐得度人應緣來現 比邱身水流月落知何處花發鶯啼又一春方外笑談清 似玉夢中煩惱細如塵老僧自說從居此卻悔平時事遠 巡

鑾

按舊志云僧伽嘗現示於此釋徒所謂顯化第二處也

子由詩第二句卽此義

### 建隆寺

宋王禹偁有碑記事見前章武殿

宋梅堯臣建隆寺詩荒臺殘壘舊名邦曾說王師此受降  
西漢衣冠拜原廟五天龍象護經窗蜀岡井味人猶品隋  
帝宮基闕尙雙自古興亡不須問風鈴閒聽響幢幢 釋  
參寥建隆秋夜詩梵唄聲沈香霧銷月明金殿影岩堯夜  
深惟有龕燈在風露滿庭人寂寥 娟娟雲月照窗扉紙  
帳行開夢覺時庭下風篁自成韻吹簫安用玉人爲

### 廣陵覽古卷二

### 二十八

### 龍興寺

一名龍興講院宋王觀芍藥譜序云花品舊傳龍興寺山  
子羅漢觀音彌陀四院爲冠

宋韓琦和袁節推龍興寺芍藥詩廣陵芍藥正奇美名與  
洛花相上下洛花年來品格卑所在隨人趁高價接頭着  
處騁新妍輕去本根無顧藉不論姚花與魏花祇供俗目  
陪妖姹廣陵之花性最高得地不移歸造化大豪大力或  
強遷費盡壅培無艷冶東園固是花之主千苞萬萼從榮  
謝似矯東君汛愛心狂殺春風不肯嫁遂令天下走香名

彷彿丹青競誇詫以此揚花較洛花自合揚花推定霸其  
間絕色可粗陳天工着意誠堪訝仙家冠子鏤紅雲金線  
粧治無匹亞旋心體弱不勝枝寶髻欹斜猶墜馬冰雪肌  
膚一纈斑新試守宮明似赭雙頭兩兩最多情象物更呈  
鞍面窠樓子亭亭欠姿媚特有怪狀堪圖寫見者方知畫  
不真未見直疑傳者詐前賢大欲巧賦詠片言未出心先  
怕天上人間少其比不似餘芳資假借我來淮海涉三春  
三訪龍興舊僧舍問得龍興好事僧每歲看承不敢暇後  
園栽植雖甚蕃及見花成由取捨出羣標致必驚人方徙

廣陵覽古卷二

二十九

矮壇臨大廈客來祇見軒檻前國艷天姿相照射因知靈  
種本自然須憑精識能陶冶君子果有育材心請視維揚  
種花者

蕃釐觀

卽古后土祠在大東門外漢元延中建唐高駢更崇大之  
祠神肖女像本漢書所謂后土富媪也政和間賜蕃釐觀  
額內舊有瓊花一株艷絕於世故又名瓊花觀

宋韓琦后土祠瓊花詩維揚一株花四海無同類年年后  
土祠獨比瓊瑶貴中含霰冰芳外團蝴蝶戲茶蘼不見香

芍藥慚多媚扶疏翠蓋圓散亂珍珠綴不從衆格繁自守  
幽姿粹嘗聞好事家欲移金穀地既違孤潔情終誤栽培  
意洛陽紅牡丹適時名轉異新榮託舊枝萬狀呈天麗天  
工借顏色深淡隨人智三春愛賞時車馬喧如市草木稟  
賦殊得天豈輕議我來首見花對月聊自醉

鑾

按瓊花古未有稱至宋始盛傳多有謂煬帝因瓊花幸  
揚州者於載籍無徵也齊東野語云花類聚八仙色微黃  
而香甚宋景文筆記曰揚州后土祠有花名玉蘂王禹偁  
愛賞之稱之日瓊花尤延之全唐詩話又謂揚州有唐昌

廣陵覽古卷二

三十

觀是以明洪武成化維揚志皆云蕃釐觀一名唐昌瓊花  
一名玉蘂不知唐昌觀在陝西長安光業坊因唐昌公主  
得名公主手植玉蘂康駢劇談載神女來遊事時王建白  
居易等各有詩此與揚州蕃釐觀遠不相涉然沿誤已久  
卽東坡亦以瓊花爲玉蘂引用唐昌故實惟葛常之韻語  
陽秋云瓊花天下無二本惟揚州后土祠有之其他皆聚  
八仙花近似而非此足以破羣誤矣然瓊花所從來究皆  
失考

玉鉤斜

在城西吳公臺下一名宮人斜乃隋葬宮人處

唐竇鞏宮人斜詩離宮路遠北原斜生死深恩不到家雲  
雨今歸何處去黃鸝飛上野棠花

以上甘泉縣